

## 2 Petoro

*Nene Gege So Masi Tanik Maine So Togogole  
Mañem Paki Ñei Borikinane Don Qepapkaikene*

<sup>1</sup> Simon Petoro, na Yesu Kristo wane qelit ñei so aposolo.

Noño koboboine Anutu so ma menañ ma menañze Yesu Kristo oño mali malip lewine suaine, ñene ñebonge, yewaka ñine ñibonge, noño kibi iwa qe ñibonmaile.

<sup>2</sup> Ñine wetñineño Anutu so Yesu ñenze Waomze dere wetka okankamami, wane wet pese so peamño maine ñinano watke payake.

*Nene Anutuño Nedora Newanñonge Enje  
Biñek Ñebuke*

<sup>3</sup> Anutu wane zonomño yeye kine kine korop ñebonge, ñene gegeze maine gekenane wetzeño ñedora newanñonge, enje detkakonane qeli ewe zonom so enje mayakatne, ea ñenane biñek qe ñeboniakane ñedora tebanñonge.

<sup>4</sup> Enje numa yaleoken okangi paki, don biñekine kakapa so lewine suaine mo ñeboniakane rake, ea ñebonge. Wane mete zamotine korop iwa ea wane ra more ñine maine kepeo bailalañ matali matali pamaike, ea kakakka arikei, paki sari Anutu wane masi tanik ea makei.

<sup>5</sup> Kinemde ea wane ñine mauluke masi tanik maine ea mali malipño takotkekei, dereret eaño masi tanikñine maine eao takotkekei,

<sup>6</sup> dereretjine eao koto wane sawe gege takotkekei, koto wane sawe gegenine eao togole togole takotkekei, togole togole njine eao menje menjen wane ewe ewek takotkekei.

<sup>7</sup> Menje menjen wane ewe ewekjine, eao kima gegenine eao yemo wet maep takotkekei.

<sup>8</sup> Kine kine korop iwanjo njinano zok manerop watke payakeo, yemo eanjo ban njibuki ewekeu paki, wet dereretjine suaki, Waomze Yesu Kristo detlukkakei.

<sup>9</sup> No mane enje ea mi ma geakeo, yemo enje deine pilik pilikine, yalinane kine kine mi kamaike, so enje alakan borikineine sauke mauluk okankake, ea wane mo nigetkake.

<sup>10</sup> Eso ea wane kimakopne, njine koso manerop sorin borin okane more togole togole maratkau, Anutujo enjine bijek ma wesak njunge, ea wane wele wakonlukeake, njine yale okangeiwo, yemo njine mi ket rasuwarekei.

<sup>11</sup> Numa iwa yale okanbi, njine ban korop rakok njune more numa lalage njibongi, Waomze so Ma Menan Ma Menanze Yesu Kristo wane gege togon Mat urum koto waketkei.

<sup>12</sup> Kine ea wane, na naso banem tanik manik iwa wane wet qelot don njidan okanmaile, njine ea mo detkoi, so don wele makoi, ea mo malilipke ma gemami.

<sup>13</sup> Na weku wetkemaile, yemo nonjo maine njinane wet dereretjine kine kine iwa wane kito wirike njidan okanikale, kepe solanerop wisika gemaileoka njidanbe menageake.

<sup>14</sup> Na mo detmaile, mi azonggi nasomde bamgoka na kepe solane iwa qelinjkaikale, Waomze

Yesuᅓo ea wane mo didiwoka nolatke.

<sup>15</sup> Na baᅓ ea wane numaine mane mauluke ra qelaᅓaᅓ ᅓidangale, na seukewe, ᅓadino ᅓine don iwa korop naso baᅓem wetke magekei.

*Kristo Kibi Qeli Ewe Zonominane Qelaᅓaᅓ Wakongi Deeneᅓo Kakoi Ea Wane Don*

<sup>16</sup> Nene ᅓei dereretko ᅓine nemu kisi yewa ma more Waomze Yesu Kristo zonominerop sari lotkeakane mi ᅓidangone. Nene ᅓenze deze qomineᅓo qeli ewe zonom qelaᅓaᅓine kakapa suaine ea kakone.

<sup>17</sup> Nene yewa metᅓem, naso eao Anutu Magak, eᅓe bakom mawa mawa so qeli ewe zonom qelaᅓaᅓ sunka mange, naso yewao weti Qeli Ewe Zonom Qelaᅓaᅓ Suaine kotinoᅓine boka-woka mane Yesu wano sarike, eaᅓo iwa yale rake, “Iwa yemo nae gipon maepne, na eᅓane simile nanlukmaike.”

<sup>18</sup> Nene ᅓenze ketzeᅓo don iwa qeliwoᅓine ketki detkone, ᅓene eᅓerop weneᅓ bonagao wa Yesu metke, yewao gekone, naso eao don ea detᅓem qeliwo ᅓine Waomᅓo raki sarike.

<sup>19</sup> Eso ea wane, ᅓene propet edo don rakoi, ea detᅓem wele okan okanmaike. Nᅓine baᅓ eᅓane don ea wane urataine mauluke mau paki, yewao wetᅓine more gekei, onoka wane, ea yemo lam yale panamango lawe okoramāᅓki, Yesu zinge sariake, naso yewao kepe qaeki Yesuᅓo sako wane serekin qelaᅓaneᅓo kotoᅓine lawe qelaᅓaniake.

<sup>20</sup> Kine kine korop, ea wane kutno yemo iwa yale desikei, ᅓei mane eᅓe oᅓomka Propet eᅓane

don Anutu wane Papiao gekoi, ea wane kine-mainie mi rayake, midakaka.

<sup>21</sup> Don rokop ea nei enjene wetkonjine dere lilikeu paki, mi ge gekoi. Yemo propet nei ene Asu Koboboineno tewek one more ebu wieki ene don yewa Anutu wanonjine sariki dere ra wakone gekoi.

## 2

### *Kito Nebo Nebon Isisine Enjane Don*

<sup>1</sup> Propet isisine ene mokaka Israel nei njerep enjane keueno wakone gekoi. Rokop yewaka kito nebo nebon isisine ban njinane keu njino wakone gekei. Ene ban matali matali ma wakone more isi don ea ma wakonikei, so Waom Yesuno sot turunjene qekokke, ene bisopkakei, eso ene yale edomka okane tebakau matali qetali wakonongi eaka mida warekei.

<sup>2</sup> Eso ene yale okanbi, nei loutne ene enjane tanik manik qotkoine ea kau paki, enjane numa ea mogare arikei, so onoka wane, ene masi ea okanikei, ea wane kepe nei njerep ene numa wele ea wane njade don raikeni.

<sup>3</sup> Kito nebo nebon isisine, nei iwa ene wesi abonjane wane bailalanj zok magemami, ea wane ene ban enjene wetkonjine isi don kine kine loutne njidangei, eamo isinjunbi paki, njinano njine wesi abonjane makei wane yale okangei. Ea wane Anutu ene enjane kine ma wakone more turunjine ebo ebon ene mo maulukke, so ene Mataliongi Mida Midaene, ene wisika tomaonge pa sariakane!

<sup>4</sup> Anutuŋo aŋelo borikine makoi, eŋe mane mi lolononge, midakaka. Eŋe siluŋ ma peikki gerep sorao ketkoi, yewao mulap togogoleŋo wokom one more wareongi, panaman kotino, nasoo Anutuŋo kineene ma wakone more turuŋene eboniakane tomaka metmami.

<sup>5</sup> Anutuŋo kepe sogine ea mane mi lolonkake, midakaka. Eŋe siluŋ raki kepeo doku qakum wakone more, eaŋo ŋei Anutu midaine, borikine ma gekoi ea korop engu wareke. Noa weku eŋe koboboine gege ea wane don rara gekane, eŋine so ŋei ŋerep sewen seseongi, waetne gekoi.

<sup>6</sup> Anutuŋo Sodom so Gomora, mat suaine etke, siukkeik wane raki, gerepŋo ezo mataliongi, siukwarekoi. Eamo ŋado Anutu midaine geu, masi daleo wakononiake, eŋane qaka ea maki ketke. Ea kaŋem paki desikene.

<sup>7</sup> Lot eŋe ŋei maine, eŋe ŋei numa midaine, eŋe borikine mado madoŋine gamu gamune ea mageu, eawane qom wikile zok dere geki, Anutuŋo seseka more qesiŋkake.

<sup>8</sup> Ŋei maine yewa, eŋe eŋane keueno geki paki, kaiweine kaiweine borikine kine kine zok manerop mau onge, so detongi paki, wet dereret so kotine maine ea tanik manik borikine okangoi, eaŋo ongi wikile zok mange.

<sup>9</sup> Eso yalinane Waom eŋe mo detmaike, ŋei maine liwe liwekoŋine makok oniakane, ŋo ŋei borikine mama wareongi, wikile dere gemageu ari Naso Suaine eao kineene ma wakone turuŋine eboniakane.

<sup>10</sup> Ŋei ea weteneŋo borikinane bolam yale laweki, nalekine tau okanmami, so Anutu so qeli

nei wawaine ebu ket biraon okanmami, nei yewa eje mulap urum togolo biraoniake.

Kito nebo nebon isisine iwa eje kaetene midaine so wawaineene teine so weti qeliwo zonomenerop gemami, eņane eweene mi kito okanmami, eje ewe mabaik okanon okanmami.

<sup>11</sup> Aņelo eje manerop togogole so zonomene zok kakapa suaine, kito nebo nebon isisine iwa eņane rokop yuan kamaike, aņelo eje Waom wane kaitko mi dere worik onbi paki, kineene ra wakonon okanmami.

<sup>12</sup> No nei iwa eje wetņoka okan okanmami, osom zubaine wakonbi ebu more engu okan okanmami, eje yale. Eje kine kine wane kine mi detpi paki yaup qaisikka okanmami. Nei iwa eje baņ osom zubaine mida sololok okan mami, yale mida sololokkei.

<sup>13</sup> Eje wikile marat kakeiwane borikine kine kine makoi, ea wane turuņene eje baņ wikileka maratkei. Eņane simileeneņo yemo eje kaiwe suaino epa Waom ma nene, so eņet ore ore, so-laeneņo simile desiakane batne okan okanmami, eje gamu gamune so kotoene di panaman gorop kauke geu paki, earop njanano takotke nara nema nema, so simile isi numaene, ea mogare isinune okanmami.

<sup>14</sup> Eje kine kine natne onikeiwane mi on okanmaike, eje nrep wenip yau yaup ma okanmami, eņeka onikeiwane on okanmaike. Eje borikine nāt qeqine makei waneka on okanmaike. Eje nei setene pelekakatne ea iwen onbi ari suba bano waketpi engu okanmaike. Kine kine yalinane qom riwe riwe eamo okan mageu, wetene ma

qotkeke. Nei yaline eje mo Anutu wane soa bano waket warekoi! Eje ban suba yale wikilenjo makokki ket edoyake.

<sup>15</sup> Eje numa koboboine ea qelin kawareu paki, numaene ea qeyau arikoi. Paki eje Balam, Beor gipolane kie tapotine ea mogare arikoi. Israel wane naba eje Balam wano ari rakoi, “Ge Israel nei nrep soak onnom, nene wesi ginikene.” Ea wane eje wesi wane simileine zok manerop pa mangane Israel enano borikinane lewine mayakane soringeke.

<sup>16</sup> Pakiso borikineinane ra more rawetkake, enjine doginjo nei don yale raki paki propet ea qelan masi mayakane okangi kitatkake.

<sup>17</sup> Nei ea eje doku deine zip ziune yale, eje kezon momo suainenjo puangi wele midaine yau yaup arimaike, yale, Anutuño nei yaline enane kepe mat gekei wane binjek qe ebonge, yemo panaman yewao njik qisilik kito pamaike.

<sup>18</sup> Eje wawaine don so qelan don, wele midaine ea ra okanmami, so kelok more nei nrep isionbi sari wekuoka qeturageu paki, qomene riweki bailalan mawakone more, solaenenjo borikine kine kine qotkoine, ea ma okanmami. Yale okane more nei natne muselemde qelan gege so tanik manikene qelinkakoi, ea waran onbi koso ari enane masi tanik qotkoine ea mogare ari okanmami.

<sup>19</sup> Eje edane ra okanmami, njine yale okanbi paki mulap midaine geu kine kine manenjo mi njibu ket biranuniake. No enjene yemo bori more mida sololok, oka okan tanik manik ea wane qelit qe qe eanjo wakonongi geu paki, don ea edan

okanmami. N̄ei mane ēje kine kine manējo maket birakakeo, yemo ēje ējane qelit mama okane geake.

<sup>20</sup> N̄ei ēje Waomze so Mapi Mapitze Yesu Kristo wet dereretenējo qotka geu paki, kepe wane kine kineine qotkoin̄e ēājo koso manerop ebu ket bi-raoniakeo, yemo n̄ei yaline ējane gege mageene, ea alakanka eamo nigatnemde borike, n̄o n̄ado gege mageene yemo manerop borilukeake.

<sup>21</sup> Ēje tanik manik maine ea wane numa koboboine, ea mane detkakoi ra, yemo maine menāj lukki rap, yemo ēje detwareu pakimo numa kunen̄ine ebonge, ea kakakka n̄adekka arikoi.

<sup>22</sup> Masi iwa okangoi, ēājo sikan n̄onmaike, yemo Papīa sogino don ea wele okanmaike, “Kasi mane ēje madōngi ket, eaka koso zinge ari ne-maike,” eso “Berek mane ēje doku tauke, eaka koso zinge ari nalek taumaik̄e.”

### 3

#### *Waom Sariakane Don Nasoine*

<sup>1</sup> Kima maepkopne! Iwa yemo nan̄ane kibi atak etke iwa qe n̄ibonmaile. Kibi etkeka ea wane kotino na liwekka more dereret n̄inane kotino wetn̄ine gununutne ea ma wisikaemaile, yemo miti don iwa korop desikeiwane qe wirike n̄ibonmaile.

<sup>2</sup> N̄ine propet koboboine edo mokaka don rakoi ea so don togon wane numa, Waom so Mapi Mapitzan̄on̄ine sarike, ea aposolo kopn̄ine edo n̄ibongoi, ea dere gekei wane na wetke n̄ibonmaile.



<sup>3</sup> Mikepka yemo ŋine korop don iwa det-warekei, onoka wane, naso qoeakane bomileki, yewao ŋei natne gege mageene borikine mama wane gom riweŋo watke watkine eje baŋ wakonikei. Wakone more eje baŋ mabaik qebaik ŋibukei.

<sup>4</sup> Paki rakei, “Yesu eje sariakane rake me? No eje diawa sarimaike? Nɛnane magakopze eje mo seuk warekoi, no yeye kine kine iwa yemo mokaka kepe mawakongi paki motke, rokop weku yewaka pa samaike!”

<sup>5</sup> Eje edom kelok kine dere more koso ra okanmami, Anutu wane ra okanmami, “Nene qauze wamaike,” mokaka Anutuŋo rakiso, qeli so kepe ere wakongoik. Kepe eje Anutu wane donŋo dokuoŋine raki wakonge paki, dokuŋo qeatkaki keuo pake.

<sup>6</sup> So doku yewa wane qakum eaŋo yaleka ŋei ŋerep so kepe sogine ea korop ma qorok ongi mida warekoi.

<sup>7</sup> No qeli so kepe ukude iwa pamamik, yemo Anutu wane don wekuŋoka mawaluk otki, gerepŋo eso matali osiakane biŋek pamamik. Ere wareotki pamamik, baŋ naso bomileake, eao ŋei borikine Anutu midaine gemami, kineene ma wakone more matalioniake.

<sup>8</sup> Kima maepkopne, don weku iwa yemo misuk nigetŋuniake! Waom wane deino yemo eje kaki kaiwe weku so koma tausen ere kine mane kine mane mi okanmamik. Eŋano yemo kaiwe weku ea koma 1, 000, so koma 1, 000, ea kaiwe weku, etke ere rokop wekuka okanmamik.

<sup>9</sup> Waom eje don rake, ea wane ŋaŋaeki paki,

naso mi ma kirowone okanmaike, nei natne njine yale mane desikeiwane. Ea wane turunjine yemo ene njine bororom okanjon okanmaike, onoka wane mida, ene nei natne midakeiwane mi det okanmaike, ea wane, no silunj ene koso nei korop wetene maingeu paki, borikine ndekakei wane ra okanmaike.

### *Qeli So Kepe Mida Lelekeik*

<sup>10</sup> No Waom wane nasonjo yemo banj kobu mama nei manenjo kobu mayakane sanku ari okanmaike, yale sanku ture noniake, kaiwe nasu yewao qeli ene ukatne suaine ma more siuke mida leleake, qeli wane yeye kine kineine eamo gerepnjo ezo wareki mida sololokkei, so kepe ene yeye kine kineine kutno pamaike, earop wenenj siuke mida leleake.

<sup>11</sup> Yeye kine kine korop ea numa yalewaoken okangi siuke midawarekei. No nei njerep njine daleo okane gekei? Njine gegenjine koboine geu paki, Anutu sunka manikei.

<sup>12</sup> Njine Anutu wane Kaiwe nasu yewa tomaka geu, paki sorin borin okane mau nasu bomile sariake, Kaiwe nasu yewao qeli ene gerepnjo zewareki mida leleake, so qeliwane kine kineine yemo gerep anjetnenjo korop kaki yanyale more mida lele ariake.

<sup>13</sup> No njene yemo Anutunjo qeli musele so kepe musele mane ea wane binjek qe njebonge, ea wane tomaka gemaine, yewao koboboine gege togon matzo gekene.

<sup>14</sup> Ea wane kimakopne, njine Kaiwe nasu ea tomaka geu paki, kotonjine warekau gunule

payake, so sot midaine Anutu wane kaitko enjerop peamgo gekei.

<sup>15</sup> Waomzeŋo sese ŋunmaike ea kau, eamo koso masuluk ŋuniakane numa ea more ŋibonmaike, eamo kima maepze Paulo Anutuŋo wet dereret mange ea ma more, ea wane rokopka ŋine qe ŋibonge.

<sup>16</sup> Kibiine qeke, eao eŋe korop don iwa waneka ramaike. Kibiine qeke, eao don natne umatne pamaike, wane don yaline ea ŋei qelaŋine so borotne eŋe kine ra siuk okanmami, so eŋe Anutu wane Papi natne pamaike, eao don natne ea yaleka ra siuk okanmami. Yale okanbi paki, edomka matali qetali okane, ea tebakau sari turuŋŋo kuteno wa okanmaike.

<sup>17</sup> Ŋo ŋine, kimakopne, iwa yemo mo derimi, ea wane ŋine diamŋine togogole makei, yale okanbi, ŋei yau yaup gegine eŋane isi donŋo ŋine misuk waraŋŋungi numanŋine mayakatne ea qeliŋka ariki.

<sup>18</sup> Ŋine takotke more Waomze so Mapi Mapikze Yesu Kristo wane wet menaŋ so kineine detlukeu paki sua togole warekei, Kristo wano qeli ewe zonom, ea iwa pamanmaike so banine pa ariake! O, Weleka.

**Waom Yesu Wane Sigi Maep Don**  
**The New Testament in the Ono Language of Papua**  
**New Guinea**  
**Nupela Testamen long tokples Ono long Niugini**

Copyright © 1991 The Bible Society of Papua New Guinea

Language: Ono

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

---

PDF generated using Haiola and XeLaTeX on 18 Apr 2025 from source files dated 31 Aug 2023

646541a1-8d36-5993-802c-6bb850da5963